



*Bigarren Lehendakariordea eta Ekonomia, Lan eta Enpleguko Sailburua  
Vicepresidente Segundo y Consejero de Economía, Trabajo y Empleo*

**AGINDUA, 2026KO MAIATZAREN 27KOA, JAURLARITZAREN BIGARREN LEHENDAKARIORDE ETA EKONOMIA, LAN ETA ENPLEGU SAILBURUARENA, 2026KO MAIATZAREN 27RAKO DEITUTAKO GREBAK IRAUTEN DUEN BITARTEAN ENPLEGATU PUBLIKO DIREN GOI-MAILAKO TEKNIKARI SANITARIOEK GIZARTEARI EMAN BEHAR ZAIZKION FUNTSEZKO ZERBITZUAK MANTEDUKO DIRELA BERMATZEN DUENA.**

---

Goi Mailako Teknikari Sanitarioen Estatuko Sindikatuak (SIETESS) greba deitu du 2026ko maiatzaren 29an, enplegatu publiko diren eta Espainiako Estatuan edozein administrazio publikotan eta haren mendeko erakundeetan lan egiten duten goi mailako osasun-teknikarientzat.

Lanaldi osoko greba maiatzaren 29ko 08:00etan hasi eta 22:00etan amaituko da, gaueko txandetan izan ezik. Gaueko txanda klasikoetako langileen kasuan (22:00etatik 08:00etara), greba aurreko eguneko 22:00etan hasiko da eta 12 orduko gaueko txanda duten ospitale eta lantokietan (20:00etatik 08:00etara), ordutegi hori duten langileen kasuan, greba aurreko eguneko 20:00etan hasiko da, hau da, maiatzaren 28an.

Grebarako deialdiaren helburua Lan Agintaritzari bidalitako jakinarazpenean jasota dago, eta hasitako espedienteetan jasota dago.

Espainiako Konstituzioaren 28.2 artikulua langileen greba egiteko eskubidea onartzen du, langileek beren interesak defenda ditzaten, horixe baita egungo zuzenbide estatu sozial eta demokratikoak oinarri dituen funtsezko eskubideetako bat. Konstituzioak, beraz, berdin babesten du greba-eskubidea eta beste zenbait eskubide garrantzitsu, hala nola bizia, osotasun fisikoa, osasuna, hezkuntza, joan-etorri askea, eta informazio askatasuna, besteak beste. Hain zuzen, Konstituzioak bete-betean babesten ditu, bai eskubide horiek guztiak, baita greba egiteko eskubidea ere.

Beraz, greba egiteko eskubidea baliatzeak talka egin dezakeenez herritarren gainerako funtsezko eskubideekin, eta Konstituzioaren 28. eta 37. artikuluetan xedatuta dagoenaren arabera, nahitaezkoa da neurri egokiak ematea Erkidegoarentzako ezinbesteko zerbitzuak bete daitezen, auzitan dauden eskubideetako bat bera ere edukirik gabe gera ez dadin.

Argi dago oinarrizko eskubideak murrizten dituen edozein neurriren konstituzionaltasuna proportzionaltasun-printzipioak zehaztu behar duela, eta printzipio hori gainditu egiten dela neurriak Konstituzio Auzitegiak ezarritako hiru betekizun edo baldintza betetzen ez baditu (122/1990 KAE, 123/1990 KAE, 8/1992 KAE eta 123/2003 KAE):

1. Egokitasun-judizioa. Haren aplikazioak proposatutako helburua lor dezake.
2. Premia-judizioa. Egoera ikusita, ez dagoela neurri egokiagorik eraginkortasun bereko helburu hori lortzeko.
3. Proportzionaltasun-judizioa. Emandako neurria edo konponbidea haztatua edo orekatua izatea, haren aplikaziotik interes orokorrerako onura edo abantaila gehiago eratortzen direlako gatazkan dauden beste ondasun edo balore batzuei kalteak baino.

Erabaki horietatik ondorioztatu behar dugu erkidegoarentzat funtsezko zerbitzuak emango direla ziurtatzeak mugatu egiten duela grebarako eskubidea baliatzeko aukera, eta horretarako nahitaezkoa dela interes desberdinak kontuan hartuta zuhertasunez jokatzeko. Alegia, ziurtatzeak berme gisa balio behar du, eskubide kontrajarrien ezinbesteko koordinaziotik abiatuta; betiere ulertuta grebalarien eskubidea mugatu beharko dela — amore eman, Goi Auzitegiaren hitzetan—, haien eskubideak grebaren bidez babesteak ezinbesteko zerbitzua jasotzeko eskubidearen komunitate/pertsona titularrari eragiten dion edo eragin liezaiokeen kaltea larriagoa bada grebalarien errebindikazio edo eskakizunen arrakastarik ez izateak eragingo lukeena baino. Hori guztia dela-eta, greba-deialdi honen aurrean, haren garapenak dituen ezaugarri zehatzak hartu beharko dira kontuan.

Denbora-eremuari dagokionez, egun bati eragiten dion greba da, 2026ko maiatzaren 29a, lanaldi osoan, 08:00etatik 22.00etara, gaueko txandetan izan ezik. Gaueko txanda klasikoetako langileen kasuan (22:00etatik 08:00etara);, greba aurreko eguneko 22:00etan hasiko da eta 12 orduko gaueko txanda duten ospitale eta lantokietan (20:00etatik 08:00etara), ordutegi hori duten langileen kasuan, greba aurreko eguneko 20:00etan hasiko da, hau da, maiatzaren 28an.

Eremu funtzionalari dagokionez, deialdia enplegatu publiko diren langile guztiei zuzentzen zaie, edozein dela ere haien kontratu-, estatutu-, funtzionario- edo lan-kontratupeko izaera, baldin eta goi-mailako teknikari espezialista sanitarioen edo goi-mailako lanbide-heziketako teknikari espezialistaren titulua badute, edozein dela ere haien kategoria profesionalaren izena.

Euskal Autonomia Erkidegoan, Osakidetza-Euskal osasun zerbitzuari eta Eusko Osasun Sailari atxikitako edo lotutako gainerako zentro propioei, Auzitegi Medikuntzako Euskal Institutuari eta Eusko Jaurlaritzako Justizia eta Giza Eskubideen Saileko Espetxe Zerbitzuen Zuzendaritzari atxikitako Arabako, Bizkaiko eta Gipuzkoako espetxeei eragiten die.

Nahiz eta Auzitegi Medikuntzako Euskal Institutua eta aipatutako espetxeak greba-deialdiaren eremu subjektiboaren barruan dauden, deialdi hori goi-mailako lanbide-heziketako titulazioa duten osasun-arloko goi-mailako teknikariei zuzentzen zaien heinean, emandako informazioaren arabera, eremu horietan ez dute kategoria hori duen zerbitzu pertsonalik ematen, eta, beraz, grebaren eragina lehen mailako arretara eta ospitale-arretara mugatzen da.

Testuinguru horretan, eta Osakidetzak aurkeztutako alegazioen arabera, grebak goi-mailako teknikarien kategoriako osasun-langile guztiei eragiten die, 1473. Pertsonari guztira, eta honako kategoria hauek barne hartzen ditu: anatomia patologikoko eta zitologiako teknikaria, audioprotesiko teknikaria, dietetikako teknikaria, osasun-dokumentazioko teknikaria, osasun-teknikari espezialista, laborategiko teknikaria, erradiodiagnostikoko teknikaria eta erradioterapiako teknikaria.

Greba-deialdiak uki ditzakeen erabiltzaileen kopuruari dagokionez, Euskal Autonomia Erkidegoko biztanleria osoa hartzen du eraginpean.

Osasuna babestea oinarritzko eskubideetako bat da zuzenbide-estatu guztietan. Egundak, herritarrek gutxienezko prestazio sanitarioak eskatzeko duten eskubide gisa ulertzen da eskubide hori, aintzat hartuz giza duintasuna eta estatu bakoitzaren gizartearen eta ekonomiaren garapen-maila. Hala, Giza Eskubideen Adierazpenak (NBE, 1948) 25.1 artikuluan dioenez, «pertsona orok du osasuna eta ongizatea edukitzeko eskubidea, eta batez ere, mediku sorospena eta gizarte-zerbitzuak»; ildo berekoak dira Europako Kontseiluaren Europako Gutun Sozialaren 11. artikulua (Turin, 1961) eta Ekonomia-, Gizarte- eta Kultura-eskubideen Nazioarteko Itunaren 12. artikulua (NBE, 1966).

Hortaz, greba-eskubidearen eta Konstituzioaren 15. eta 43.1. artikuluetan jasotako beste zenbait eskubideren arteko gatazkan (bizitzeko eskubidea, osotasun fisiko eta moralerako eskubidea eta osasuna babestekoa), ezinbesteko baldintza da azken horiek bermatu beharra. Osasun-zerbitzu publiko nahiz pribatuek pertsonen osasuna eta bizia zaindu behar dute.

Horren ondorioz, eta greba-deialdiari dagokionez, ez da argudiorik behar edo argudio gutxi behar da larrialdiko zerbitzuak bete-betean mantentzea behar-beharrezkoa dela adierazteko; izan ere, zerbitzu horietan berehala esku hartu ezean, gerta daiteke norbaiten bizia arrisku larrian egotea.

Orobat, «ospitaleratutako pazienteak behar bezala artatu ahal izateko», ospitaleratutako paziente bakoitzari behar bezala eman behar zaizkio botikak, higiene-egoera egokia bermatu behar zaio, eta jaten eman behar zaio, otorduak errespetatu; esan nahi baita, beharrezko asistentzia eman behar zaio, bere osotasun fisiko eta morala honda ez dadin.

Era berean, dialisi-prozesuak eta aurrez zehaztutako tratamenduak eta atzeraezinak mantendu beharko dira.

Horri dagokionez, Osasun Sistema Nazionaleko A1 taldeko osasun-langileen grebaren harira (hainbat jardunalditan egin zen deialdia 2026ko otsailean, martxoan, apirilean, maiatzaren eta ekainean), eta maiatzeko aldia hastean, Euskadiko Medikuen Sindikatuko Idazkaritza Nagusiak eta Osakidetza-Euskal Osasun Zerbitzuak planteatu zuten argitu behar zela, besteak beste, zer funtzio hartu behar ziren atzeraezintzat.

Gogoeta horietan oinarrituta, lan-agintaritza honek 2026ko apirilaren 24ko Agindua eman zuen, 2026ko otsailaren 11ko Agindua aldatzen duena, besteak beste, prozesu atzeraezintzat hartu behar zela zehazteko. Agindu horren aurkako errekurtoa jarri zuen SME sindikatuak, oinarritzeko eskubideak babesteko prozedura bereziaren bidez. Hala, 2026ko maiatzaren 13ko autoaren bidez, Euskal Autonomia Erkidegoko Justizia Auzitegi Nagusiko Administrazioarekiko Auzien Salako 2. atalak adierazi zuen aurkaratutako aginduak zehaztasun handiagoz zehazten zituela alde aurretik ezarritako zerbitzuak, eta honako hau adierazi zuen: «Otsailaren 11ko Aginduak prozesu atzeraezinean erantzun behar zitzaizela adierazten zuen lekuan, orain aurkaratutako Aginduak zehaztu eta definitzen ditu, nahasmena saihesteko».

Testuinguru horretan, 2026ko maiatzaren 25eko eta ekainaren 15eko grebarako deitutako erdi-mailako teknikarien eta goi-mailako teknikarien lanbide-kategoria guztietako Osasun Sistema Nazionaleko osasun-zerbitzuetako langileek gizartearentzako ezinbesteko zerbitzuak emango dituztela bermatzen duen 2026ko maiatzaren 21eko Aginduan, aipatutako irizpideak kontuan hartu ziren, nahiz eta beste kolektibo baterako definitu.

Hala, kontuan hartuta greba-deialdi honek goi-mailako osasun-teknikariei eragiten diela, bidezkoa da, analogiaz, prozesu atzeraezintzat hartzeari buruz lehen ezarritakoa aplikatzea; izan ere, kolektibo horrek betetzen dituen eginkizunak ere funtsezkoak dira asistentziaren jarraitasuna eta osasun-zerbitzuen prestazio egokia bermatzeko.

Ondorioz, kasu honetan ere, atzeraezinak diren prozesuak bermatu beharko dira, hau da, eguneko ospitale onkohematologikoaren jardura, hemodinamika, iktus-unitateak, zainketa intentsiboak, neonatologia, erditzeak, Transfusio eta Giza Ehunen Euskal Zentroan (TGEEZ) egiten den jardura, bai eta mendeko beste edozein tratamendu edo proba osagarri ere, baldin eta horiek eteteak pazientearen bizitza edo osasuna arriskuan jartzen badu, edo aukera edo eraginkortasun terapeutikoa galtzen badu, irizpidearen arabera eta medikuaren erantzukizunpean.

Osasun-arloko lehen mailako arretari dagokionez, arazorik gabe hartzen da oinarrizko zerbitzutzat, ospitalez kanpoko larrialdiei estaldura ematen dien heinean batez ere. Jarduera-sektore honetan gutxieneko zerbitzuak ezartzeari dagokionez, esan behar da, Euskal Autonomia Erkidegoko Justizia Auzitegi Nagusiko administrazioarekiko auzien salak emandako epai batzuen ondotik: 2012ko urriaren 3koa, deuseztat jo zituena 2012ko martxoaren 29an 24 orduko greba orokorra egiteko 2012ko martxoaren 23ko Aginduaren bidez ezarri ziren lehen mailako arretarako gutxieneko zerbitzuak; eta 2013ko martxoaren 5koa, deuseztat jo zituena 2012ko azaroaren 14an eta 2013ko maiatzaren 30ean 24 orduko greba orokorrak egiteko 2012ko irailaren 19ko Aginduaren bidez ezarri ziren lehen mailako arretarako gutxieneko zerbitzuak; eta 2016ko ekainaren 14ko greba-deialdia, Osakidetza-Euskal osasun zerbitzuko langileentzat egina, txanda guztietarako bi orduko ordu-tarteetan –ez dago jasota haien aurka egin zenik, ez administrazio-bidetik, ez auzibidetik–), gobernu-agintariek erabaki zuten larunbatetako lanaldiari dagokiona –eta larunbatetako ohiko ordutegia– ezarriko zutela lehen mailako arretarako gutxieneko zerbitzu gisa, greba-egunerako aurreikusita zegoen langile-kopuruarekin; horrenbestez, eutsi egin zaie zerbitzu horiei. 2018ko martxoaren 8ko grebaren aurrean, zerbitzu berberak ezarri ziren. Azkeneko horretan, ordea, errekurrituak izan ziren oinarrizko eskubideen babes juridikzionalaren prozedura bereziaren bitartez; hala ere, Salak Zuzenbidearekin bat zetozela ebatzi zuen, interpretazio-lana egin ondoren. Horrexegatik, azkeneko greba orokorrari begira -2019ko martxoak 8- zerbitzuak mantendu baziren ere, idazketa zuzenagoa erabili zen. Orduko zerbitzuak arazorik gabe gauzatu zirenez, eutsi egin zaie deialdi honetan.

Larrialdi-zerbitzuei eta Etengabeko Arreta Guneei (aurrerantzean, EAG) dagokienez, Euskal Autonomia Erkidegoko Justizia Auzitegi Nagusiko administrazioarekiko auzien salaren 2012ko urriaren 3ko Epaiak ezetsi zuen errekurtsogileak larrialdi-zerbitzuetarako eta etengabeko arretaguneetarako ezarritako gutxieneko zerbitzuen inguruan zuen asmoa, hau da, zerbitzu horiek gehiegizkotzat jotzea (%100eko zerbitzuak ezarri ziren), arrazoi hau aipatuta: «larrialdi-zerbitzuen izaerak berak eta etengabeko arretaguneen helburuak justifikatu egiten dute, aztergai dugun eremuan (osasunaren eremuan) eta osotasun fisikoa eta bizitzeko eskubidea ahaztu gabe, errekurtsua jaso duen aginduan bildutako gutxieneko zerbitzuak ezartzea»; horrenbestez, eutsi egin zaie zerbitzu horiei.

Gutxieneko zerbitzu antzekoak ezarri ziren 2023ko urriaren 23ko Aginduan, 2024ko martxoaren 8ko Aginduan eta 2025eko urriaren 1eko Aginduan, Euskal Sektore Publikoan deitutako bi grebaren ondorioz emandakoak, bai eta lau greba orokorretarako emandako 2023ko azaroaren 28ko eta 2024ko irailaren 26ko, 2025eko urriaren 13ko eta 2026ko martxoaren 13ko Aginduetan ere.

Hala ere, orduan ezarritako gutxieneko zerbitzuak ez dira premisa juridiko loteste bat deialdi honetako gutxieneko zerbitzuak finkatzeko – doktrina konstituzionalak debekatutako inferentzia-, baina aukera ematen dute egiaztatzeko zer ondorio positibo edo negatibo izan dituzten agindu honek babestu nahi dituen eskubide eta ondasun konstituzionalentzako – grebakoa barne-. Horregatik, agindu honek eutsi egiten die orduan emandako gutxieneko zerbitzuei.

Gobernu Agintaritzari gai honetan eskumen eksklusiboa esleitzeak bermatu nahi du greba-eskubidearen erabilerak izan behar dituen mugak Zuzenbidearen arabera baino ezin izango direla ezarri, oinarrizko beste eskubide batzuk betetzera bideratutako funtsezko zerbitzu jakin batzuei eustearren, eta gobernatzeko erantzukizuna eta ahala duenak bakarrik.

Hain zuzen ere, Lan Harremani buruzko martxoaren 4ko 17/1977 Errege Lege Dekretuaren 10.2 artikulua honako hau xedatzen du: «greba egiten denean edozein zerbitzu publiko edo onartuta dagoen eta gerorazina den beharriazko edozein zerbitzu emateko enpresetan, eta larritasun bereziko inguruabarrak daudenean, gobernu-agintaritzak beharrezkoak diren neurriak hartu ahal izango ditu zerbitzuen funtzionamendua ziurtatzeko» eta «Gobernuak, era berean, helburu horietarako esku-hartze neurri egokiak hartu ahal izango ditu».

Arau horretan – konstituzionala da (Konstituzio Auzitegiaren 11/1981 Epaia, apirilaren 8koa [KAB 1981\11]), Konstituzioaren greba-eskubideari buruzko 28.2 artikuluekin bat etorriz, non honako hau ezartzen baita: «eskubide horren erabilera arautzen duen legeak beharrezko bermeak ezarriko ditu gizartearentzako funtsezko zerbitzuei eutsiko zaiela ziurtatzeko» –, gobernu-agintaritzari ematen zaio edozein motatako berme-neurri hartzeko aukera, greba-kasuan funtsezko zerbitzuei eutsiko zaiela bermatzeko. Neurri horietako bat da administrazio-ebazpen bidez jarduerari eusteko ezinbesteko gutxieneko zerbitzuak ezartzea, eta zerbitzu horiek emateko deia egitea lan-prestazioa eman behar duten langile kopuru jakin bati.

Hori dela eta, Lan Harremani buruzko Errege Lege-Dekretuaren (martxoaren 4ko 17/1977 Errege Lege-Dekretuaren) 10.2. artikulua aipatzen duen prozedura hasi da, eta entzunaldia eman zaie ukitutako aldeei, enpresa-elkarteei eta sindikatuen ordezkariari, baita Foru Aldundiari ere, alegazioak egin ditzaten gizartearentzako funtsezkoak diren zerbitzu hauek bermatzeko beharriazkoak buruz, bai eta, hala badagokio, estali beharreko gutxieneko zerbitzuak proposa ditzaten ere.

Ekonomia, Lan eta Enplegu Sailaren egitura organikoa eta funtzionala ezartzen duen Azaroaren 5eko 323/2024 Dekretuaren 3. artikulua aipatutako Sailaren titularrari esleitzen dizkio ekainaren 23ko 18/2024 Dekretuak (Euskal Autonomia Erkidegoaren Administrazio sailak sortu, ezabatu eta aldatzen dituen eta horien egitekoak eta jardun-arloak finkatzen dituen) lan-legeria betearaztearen arloan bereganatutako eskumenak. Zehazki, aipatutako artikuluen 2. j) apartatuak ezartzen du ekainaren 11ko 139/1996 Dekretuak xedatzen duen eskumen delegatua egikaritzea, hau da, zerbitzu publikoak edo premia biziko eta atzerazineko zerbitzuak eskaintzeko ardura duten enpresa, entitate edo erakundeetan greba-eskubideaz baliatzen direnean, Autonomia Erkidegoko funtsezko zerbitzuei jardunean eutsiko zaiela ziurtatzeko behar diren neurriak hartzeko eskumena.

Horregatik guztiagatik, Gobernuak bigarren lehendakariordeak eta Ekonomia, Lan eta Enplegu sailburuak, Eusko Jaurlaritzaren ordezkariak hartuta, honako hau,

#### **EBAZTEN DU:**

**Lehena.-** Euskal Autonomia Erkidegoko enplegatutako publikoak diren goi-mailako osasun-teknikariari 2026ko maiatzaren 29rako deitutako greba eskubidea baliatu ahal izateko, deialdian adierazitako ordutegian, honako funtsezko prestazio eta gutxieneko zerbitzuei eutsi beharko zaie:

##### **1.1 Zerbitzu Minimoak:**

- a) Ospitaleetan, jaiegun bateko ohiko langileekin, larrialdi-zerbitzuak eta ospitaleratutako gaixoei eman beharreko arreta, alta medikoak emateko beharrezkoa den edozein prozesu mota barne.

Dialisi-prozesuen eta aurrez zehaztutako tratamendu onkologikoen % 100 bermatuko da.

Prozesu atzeraezinen % 100 bermatuko da. Halakotzat hartuko dira eguneko ospitale onkohematologikoaren jarduera, hemodinamika, iktus-unitateak, zainketa intentsiboak, neonatologia, erditzeak, Transfusio eta Giza Ehunen Euskal Zentroan (TGEEZ) egiten den jarduera, bai eta mendeko beste edozein tratamendu edo proba osagarri ere, baldin eta horiek eteteak pazientearen bizitza edo osasuna arriskuan jartzen badu, edo aukera edo eraginkortasun terapeutikoa galtzen badu, irizpidearen arabera eta medikuaren erantzukizunpean.

- b) Lehen mailako arretan, deitutako greba-egunean lan egin behar duten osasun-zentroetako langileekin, larunbat batean zerbitzu horiek ematen dituzten langileen kopuruak emandako larunbat bateko zerbitzuak.
- c) Larrialdi-zerbitzuen eta EAGen % 100.

1.2 Gutxieneko zerbitzu horiek nahitaez bete beharko dira, deialdian ezarritakoaren arabera. Deitutako greba-eguna maiatzaren 29ko 08:00etan hasi eta 22:00etan amaituko da, gaueko txandetako langileentzat izan ezik. Gaueko txanda klasikoetako langileen kasuan (22:00etatik 08:00etara), greba aurreko eguneko 22:00etan hasiko da; eta 12 orduko gaueko txanda duten ospitale eta lantokietan (20:00etatik 08:00etara), ordutegi hori duten langileen kasuan, greba aurreko eguneko 20:00etan hasiko da, hau da, maiatzaren 28an.

**Bigarrena.-** Adierazitako zerbitzuak aldatu ahal izango dira, dagozkion administrazio-izapideak egin ondoren, grebaren iraupenaren arabera edo arrazoi higienikoen, biosanitarioen edo gerora sortutako bestelako aparteko arrazoiak hala eskatzen dutenean.

**Hirugarrena.-** 1.- Ahal izatekotan, zerbitzu horiek greba egin behar ez duten langileek emango dituzte.

2. Langileen ordezkariari entzun eta gero, enpresen zuzendaritzak esleituko ditu langileek bete beharreko eginkizunak. Nolanahi ere, aurreko artikuluan eta indarrean dauden legeetan ezarritako mugak errespetatu beharko ditu.

**Laugarrena.-** Agindu honen aurreko apartatuetan bildutako gutxieneko zerbitzuak ezin izango dira aldatu horiek egiteko izendatuta dauden langileen aldaketen edo lanuzteen ondorioz. Halakorik gertatuz gero, legez kontraktotzat joko dira eta horiek egiten dituztenak izango dira erantzule, eta erantzukizuna eskatuko zaie indarrean dagoen ordenamendu juridikoaren arabera.

**Bosgarrena.-** Aurreko artikuluetan xedatutakoa gorabehera, greba egiten duten langileen eskubideak, grebari buruzko araudiak aitortzen dituenak, ez dira inola ere murriztuko, ezta grebarako deia egin dutenen eskakizunen izapidetzea eta ondorioak mugatuko ere.

**Seigarrena.-** Jakinarazten den egunean jarriko da indarrean agindu hau.



**Zazpigarrena.-** Agindu honen berri eman behar zaie interesdunei, urriaren 1eko 39/2015 Legeak (Administrazio Publikoen Administrazio Prozedura Erkidearenak) 40. artikuluan xedatutako moduan; halaber, Administrazio Publikoen Administrazio Prozedura Erkidearen urriaren 1eko 39/2015 Legearen 123. eta 124. artikuluetan aurreikusitakoari jarraiki, agindu honen aurka aukerako berraztertze errekurtsua aurkez daiteke organo honetan, hilabeteko epean agindua jakinarazi eta biharamunetik hasita.

Era berean, ebazpenak administrazio-bidea agortzen duenez, horren aurka administrazioarekiko auzi-errekurtsua jarri ahal izango da Euskal Autonomia Erkidegoko Auzitegi Nagusian, ebazpena jakinarazten denetik 2 hilabeteko epean, Administrazioarekiko Auzien Jurisdikzioa arautzen duen uztailaren 13ko 29/1998 Legean xedatutakoaren arabera.

Vitoria-Gasteizen,

**MIGUEL TORRES LORENZO**  
**VICEPRESIDENTE SEGUNDO DEL GOBIERNO Y**  
**CONSEJERO DE ECONOMÍA, TRABAJO Y EMPLEO**